

Тогда гуси возгагатали и лебеди возплескали крилами своими. Не гуси ж то возгогатали, паганыи цар Мамай пришел и воеводство привел. Вжо победы их пашутся, а птицы под облаки летают. А ворони часто играют, а галицы своею речю говорят, орли в гаму кличут, волцы грозно выют, а лисицы на костех брешут. Земля, земля резанская, тепер бо ест коко зо Соломоном царем побывали.

То ти уж бо ястреби и соколи и белоозерстии кречеты отривахуся от златых а колкоцы ис камени грады Москвы, обриваху шевковыя опутины, возвиваючися под синия небеса, звонечи золотыми колоколы. Над быстрым Доном хотят ударити на многие стады гусинья и на лебединья, а богатыри руския удалцы хотат ударити на великия силы поганого царя Мамайя.

Тогда князь великий Дмитрий заплакал гарко и рече: господи боже мой, на тя уповах, да не постыжуся (л. 39) во веки, на да посмеются врази мои. Втер слезы свои и воступает во позлощное свое стремя и взял меч свой во правую руку и помолися богу и пречистой его матери. Солнце ему ясная сияет на востак, пут поведает, святой Борис и <Г>лебъ молитву творит за сродники своя.

Што пишут, што гримит, что грит рана пред зорами? Князь Володимер полки перебираетъ и ведет к быстрому Дону ко брату своему князю Дмитрию Ивановичу. Княже великий Дмитрий Иванович, не оставиумо великим полком. Не слухай изменников, не услобляй поганым татаром. Уже бо поганые татарове поля наступают, а хоробруя нашу дружину побивают.

И рече князь Дмитрей великий Иванович брату своему князю Володимеру Ондреевичу: Брате милый, сами есмо себе два браты, сынове есмо велико<го> князя Ивана Данилевалча Каметы,¹ а внучата есмо великого князя Даниля Александровича. А воеводы в нас воставлены крепкия 70 бояринов, а князь белоозерстии Федор Семенович, два брата Олгиродовичи, князь Андреи Бранский, а князь Дмитрей Волинский, а Тимофей Волоевич, Андреи Серкизовичъ, а Михайла Иванович. У боя нас людей 300 тисецъ кованья раты, а воеводы в нас крепкия, ведомоя дружина, а под собою маем кони борздыя, но себе (л. 39 об.) маем доспези позлащенныя, а шоломы чиркаския, а щити московския, а сулицы немецкия, а кофыи фразския, а кинжалы мисурскими, а мечи булатныя, а дороги нам сведомо, а перевозы в нас в нас в<с>тавлены, но еще хощем силно главы свои положити за святыя божия церква, за православленную веру христианскую и за землю Рускую. Пашут бо кафир, ищут бо себе чести и <с>лавы и великого имени.

Уже бо я<с>стреби и соколи и белоозерстии кречеты прилетеша и удариша на многия стада со силныя и на лебединья. То ти быша ни соколи ни кречеть, то то уже изехалися далныя люди князи руския, богатыри литовския но великия силы татарския и удадариша² кафыи фраз-

¹ Калиты

² удариша